



Sumáriu Kazu

Tribunál Distritál Suai

Outubru 2013

Sumáriu prosesu julgamentu Tribunál Distritál Suai Períodu Outubru 2013

Introdusaun

Iha semana primeiru fulan-Outubru 2013, JSMP monitoriza kazu 14 iha Tribunál Distritál Suai (TDS).

Kazu hirak ne'e kompostu husi kazu krime omisídiu simples 1, kazu krime abuza skesuál ba menõr 2, kazu krime ofensas grave 1, kazu krime violénsia doméstika 4, kazu krime inséndio 1, kazu krime pekulatu 1, kazu krime aktu seksuál ba adolsente 1, kazu krime danu simples 1, kazu krime roubu 1 no kazu krime furtu agravadu 1.

Husi kazu 14 ne'e kazu 11 mak tribunál konklui ona nia prosesu. Kazu 8 kondena ho pena suspensaun no selu multa, kazu 1 kondena ho pena prizaun tinan 10 no selu indemnizasaun US\$ 1.000,00 no restu kazu 3 sei kontinua prosesu.

Tuir mai deskrisaun sumáriu julgamentu kazu kompletu:

1. Kazu krime omisídiu simples Nú Prosesu: 34/pen/2007/TDS

Kompozisaun Tribunál : Kolektivu
Juis : Dr. Pedro Raposo de Figueiredo, Dr . Costâncio B. Basmery, no Dr. Argentino Luisa Nunes.
Ministériu Públiku : Dr. Felismino G. Cardoso.
Defeza : Dr. Manuel Gonçalves (Advogadu privadu)
Konkluziun : Kondena arguidu CLR ho pena prizaun tinan 3 suspende ba tinan 4 no absolve arguidu nain 4.

Iha 10 Outubru 2013, Tribunál Distritál Suai hala'o julgamentu leitura akordaun ba kazu omisídiu ne'ebé involve arguidu CLR, JL, JJA, FJM, AA hasoru JDCA ne'ebé akontese iha 19 Novembru 2006, iha Distritu Ainaro.

Ministériu Públiku akuza katak, iha 19 Novembru 2006, arguidu sira asalta vítima wainhira fila husi missa.

Arguidu CLR deklara katak nia la lori tudik sona vítima maibé wainhira nia to'o ba iha fatin akontesimentu nia haree vítima mate ona.

Testamuña EC ho AOS iha sira nia depoimentu deklara katak sira la haree ho matan no la hatene kona-ba vítima nia mate ne'e, maibé depoisde akontesimentu mak sira rona no ba haree.

Ministériu Públiku akuza arguidu sira kontra artigu 138 Kódigu Penál kona-ba omisídiu simples ne'ebé ho nia pena abstratu entre tinan 5 to'o tinan 15 prizaun.

Iha alegasaun finál, Ministériu Públiku husu ba tribunál atu kondena arguidu sira ho pena prizaun tinan 12 tanba arguidu sira komete duni krime ne'e.

Defeza husu ba tribunál atu fó justisa ne'ebé justu ba arguidu tanba arguidu sira konfesa loloos tuir faktus ne'ebé mak sira halo.

Tribunál konklui kazu ne'e hodi kondena arguidu CLR ho pena prizaun tinan 3 suspende ba tinan 4, no absolve arguidu JL, JJA, FJM, ho AA husi prosesu ne'e.

2. Kazu krime violénsia doméstika -Nú Prosesu: 28/pen/2013/TDS

Kompozisaun Tribunál : Singulár
Juis : Dr. Argentino Luisa Nunes
Ministériu Públiku : Dr. Felismino G. Cardoso
Defeza : Dr. Marçal Mascarehas
Konkluzau : Kondena ho pena prizaun tinan 2 suspende ba tinan 3.

Iha 10 Outubru 2013, Tribunál Distritál Suai hala'o julgamentu ba kazu violénsia doméstika ne'ebé arguidu IP hasoru nia feen. Kazu ne'e akontese iha 14 Janeiru 2012, iha Distritu Covalima.

Ministériu Públiku katak, iha 14 Janeiru 2012, maizumenus tuku 10:00 dader, arguidu lori be foer fakar ba vítima no kontinua tuku dala ida iha vítima nia hasan parte loos no vítima monu ba rai. Aktu ne'e rezulta vítima hetan bubu iha nia rentos.

Iha tribunál arguidu konfesa totalmente ba faktus no provas ne'ebé mak Ministériu Públiku akuza ba nia.

Ministériu Públiku akuza arguidu kontra artigu 145 Kódigu Penál, kona-ba ofensa ba integridade fizika simples ho natureza krime violénsia doméstika konjuga ho artigu 35 alinea (b) Lei Kontra Violénsia Doméstika.

Iha alegasaun finál, Ministériu Públiku husu ba tribunál atu kondena arguidu ho pena prizaun fulan 6 no suspende ba tinan 1. Alegasaun ne'e bazeia ba produsan provas hatudu katak arguidu komete duni krime ne'ebé Ministériu Públiku akuza ba arguidu.

Defeza husu tribunál atu fó pena ne'ebé justu ba arguidu tanba arguidu ho vítima diak malu ona, sira hela hamutuk nu'udar feen ho la'en hanesan bai-bain no nunca mósu problema to'o agora.

Tribunál konklui kazu ne'e hodi kondena arguidu ho pena prizaun tinan 2 suspende ba tinan 3.

3. Kazu krime abuza seksuál ba menõrNú Prosesu: 198/pen/2013/TDS

Kompozisaun Tribunál : Kolektivu

Juis : Dr. Costâncio B. Basmerly Dr. Argentino Luisa Nunes no
Dr. Pedro R. de Figueiredo
Ministériu Públiku : Dr. Felismino G. Cardoso
Defeza : Dr. João Henrique de Carvalho
Konkluzau : Sei kontinua prosesu sei kontinua

Iha 09 Outubru 2013, Tribunál Distritál Suai hala'o julgamentu ba kazu abuza seksuál ba menõr ne'ebé involve arguidu MF hasoru vítima JGC. Kazu akontese iha 21 Outubru 2011, iha Distritu Ainaro.

Ministériu Públiku akuza katak, iha 10 Janeiru 2011 maizumenus tuku 08:00 kalan, arguidu fó aimoruk ba vítima hemu halo vítima matan dukur arguidu mós kontinua kolu vítima nia roupa hotu hodi halo violasaun seksuál ho vítima.

Vítima deklara katak arguidu halo relasaun seksuál ba nia hamutuk dala 10. Arguidu konfesa totalmente ba faktus no provas ne'ebé Ministériu Públiku akuza ba nia.

Ministériu Públiku akuza arguidu kontra artigu 177 Kódigu Penál kona-ba abuza seksuál ba menõr ne'ebé ho nia moldura pena husi tinan 5 to'o 15 prizaun.

Tuir depoimentu husi testemuña LGC katak nia la haree no la hatene kona-ba akontesimentu ne'e, maibe nia hatene deit kona-ba vítima nia loron moris.

Iha alegasaun finál, Ministériu Publikú husu ba tribunál atu kondena arguidu ho pena prizaun tinan 8. Alegasaun ne'e bazeia ba produsan provas hatudu katak arguidu komete duni krime ne'ebé Ministériu Publikú akuza ba arguidu.

Defeza husu ba tribunál atu fó pena ne'ebé justu ba arguidu tanba arguidu konfesa totalmente ba faktus no provas ne'ebé nia halo, arguidu mós arrepende ba nia hahalok.

Depois rona tiha deklarasaun testemuña no alegasaun husi parte sira, tribunál adia fali julagementu ba iha 24 Outubru tuku 14:00 lorokraik hodi rona leitura sentensa.

4. Kazu krime violénsia doméstika -Nú Prosesu: 111/pen/2013/TDS

Kompozisaun Tribunál : Singulár
Juis : Dr. Pedro R. de Figueiredo
Ministériu Públiku : Dr. Felismino G. Cardoso
Defeza : Dr. Marcal Mascarenhas
Konkluzau : Kondena pena prizaun fulan 9 suspende ba tinan 2 no selu indemnizasaun \$ 150,00

Iha 03 Outubru 2013, Tribunál Distritál Suai hala'o julgamentu ba kazu violénsia doméstika ne'ebé involve arguidu MC hasoru vítima ZM (feen) no GM hanesan ema ne'ebé arguidu dun ba vítima. Kazu ne'e akontese iha 08 Abril 2013, iha Distritu Covalima.

Ministériu Públiku katak, iha 08 Abril; 2013, maizumenus tuku 11:00 dader, arguidu diskonfia no dun nia feen toba ho mane seluk. Tanba ne'e, arguidu lori katana taa vítima nia liman no kelen tookanek no arguidu kontinua taa tan dala ida ba vítima GM nia ulun too kanek.

Ministériu Públiku akuza arguidu kontra artigu 145 Kódigu Penál, kona-ba ofensa ba integridade fizika simples ho natureza krime violénsia doméstika konjuga ho artigu 35 alineaia (b) Lei Kontra Violénsia Doméstika.

Iha alegasaun finál, Ministériu Publikú husu ba tribunál atu kondena arguidu ho pena prizaun tinan 1 no suspende ba tinan 3. Alegasaun ne'e bazeia ba produsan provas hatudu katak arguidu komete duni krime ne'ebé Ministériu Publikú akuza ba arguidu.

Defeza husu tribunál atu fó pena ne'ebé justu ba arguidu tanba arguidu ho vítima diak malu ona, sira hela hamutuk nu'udar feen ho la'en hanesan bai-bain no nunca mósu problema to'o agora.

Bazeia ba faktu sira ne'ebé produz durante julgamentu, iha 10 Outobru 2013, tribunál konklui prosesu ne'e no kondena arguidu ho pena prizaun tinan 1 suspende ba tinan 2 no selu indemnizasaun ba vítima MC ho MG ho montante \$ 150,00.

5. Kazu krime abuza seksuál ba menõr-Nú Prosesu: 51/pen/2010/TDS

Kompozisaun Tribunál : Kolektivu
Juis : Dr. Pedro R. de Figueireido Dr. Costâncio B. Basmerly no
Dr. Argentino Luisa Nunes
Ministériu Públiku : Dra.Benvinda da Costa Rosario
Defeza : Dr. Marçal Mascarenhas
Konkluzau : Kondena pena prizaun tinan 10 no selu indemnizasaun ba
vítima hamutuk \$ 1000,00

Iha 09 Outobru 2013, Tribunál Distritál Suai hala'o julgamentu hodi lee leitura sentesa ba kazu abuza seksuál ba menõr ne'ebé involve arguidu SCR hasoru vítima JR. Kazu akontese iha 12 Abril 2009 iha Distritu Ainaro.

Ministériu Públiku akuza katak, iha 12 Abril 2009 maizumenus tuku 11:00 dader arguidu tama ba vítima nia kuartu laran wainhira vítima fila husi iskola hodi ameasa no hasai hotu vítima nia roupa hafoin halo violasaun seksuál ho vítima. Aktu ne'e halo vítima tauk no moe atu fila ba uma.

Vítima deklara katak arguidu halo relasaun seksuál ba nia hamutuk dala 6 durante ne'e.

Ministériu Públiku akuza arguidu kontra artigu 177 Kódigu Penál kona-ba abuza seksuál ba menõr ne'ebé ho nia muldura pena husi tinan 5 to'o 15 prizaun.

Iha alegasaun finál, Ministériu Publikú husu ba tribunál atu kondena arguidu ho pena prizaun tinan 12. Alegasaun ne'e bazeia ba produsan provas hatudu katak arguidu komete duni krime ne'ebé Ministériu Publikú akuza ba arguidu.

Defeza husu ba tribunál atu fó pena ne'ebé justu ba arguidu maske agora ne'e arguidu halai tia ba indonesia.

Mesmu arguidu oras ne'e halai ba Indonezia maibe, tribunál kontinua kondena arguidu ho pena prizaun tinan 10 no selu indemnizasaun ba vítima hamutuk \$ 1000,00.

6. Kazu krime inséndiu-Nú. Prosesu: 82/pen/2013/TDS

Kompozisaun Tribunál : Kolektivu

Juis : Dr. Pedro Raposo de Figueiredo, Dr. Argentino Luisa Nunes no
Dra. Florencia Freitas
Ministériu Públiku : Dr. Felismino G. Cardoso
Defeza : Dr. João Henrique de Carvalho
Konkluzau : Sei kontinua prosesu

Iha 11 Outubru 2013, Tribunál Distritál Suai hala'o julgamentu ba kazu inséndiu ne'ebé involve arguidu MSJR, FS, FG, ALLA, RSSH, BS, DA, AC, ABM, HLB, RBMS hasoru vítima MM, AM, EA, VP, FLM. Kazu ne'e akontese iha 18 Outubru 2010, iha Distritu Bobonaro.

Ministériu Públiku katak, iha 18 Otubru 2010, maizumenus tuku 06:00 lorokraik, arguidu sira ba asalta armazen no sunu tiha armazen ne'ebé rai material atu hodi halo igreja Kristaun Evanjelita nian ho montante US 10,000,00.

Ministériu Públiku akuza arguidu sira kontra artigu 263 Kódigu Penál, kona-ba inséndio n'ebe ho nia moldura pena husi tinan 2 to'o tinan 8 prizaun.

Vítima sira deklara katak arguidu sira mak estraga no sunu armazen iha akontesimentu ne'eba.

Depois rona tiha deklarasaun husi vítima sira, tribunál marka fali julgamentu ba fali iha 05 Novembru 2013 hodi rona depoimentu husi testemuña ne'ebé la marka sira nia prezensa iha tribunál.

7. Kazu krime violénsia doméstika Nú Prosesu : 33/pen/ 2013/ TDS

Kompozisaun Tribunál : Singular
Juis : Dra. Florencia Freitas
Ministériu Públiku : Dr. Antonio Tavares
Defeza : Dr. Marcal Mascarenhas
Konkluzau : Kondena ho pena prizaun fulan 6 suspende ba tinan 1 no selu kustus \$ 10,00

Iha 11 Outubru 2013, Tribunál Distritál Suai hala'o julgamentu leitura akordaun ba kazu violénsia doméstika ne'ebé involve arguidu LMS hasoru nia feen. Kazu ne'e akontese iha 12 Setembru 2012, iha Distritu Covalima.

Ministériu Públiku katak, iha 12 Setembru 2012, maizumenus tuku 11:30 dader, vítima lori mangera baku arguidu dala 4 iha kotuk laran hodi halo arguidu nervoju no arguidu halo reazem hasoru vítima no lori pasta tuda no tuku dala ida iha vítima nia ibun too monu ba rai.

Ministériu Públiku akuza arguidu kontra artigu 145 Kódigu Penál, kona-ba ofensas ba integridde fizika simples ho natureza krime violénsia doméstika konjuga ho artigu 35 alinea (b) Lei Kontra Violénsia Doméstika.

Iha alegasaun finál, Ministériu Publikú husu ba tribunál atu aplika pena multa ba arguidu.

Defeza husu tribunál atu fó pena suspensaun ne'ebé kma'an ba arguidu sira tanba arguidu sira ho vítima diak malu no nunca mósu problema to'o agora.

Kazu ne'e konklui iha 21 Outobru 2013, no tribunál kondena arguidu ho pena prizaun fulan 6 suspende ba tinan 1 no selu kustus judisial \$ 10,00.

8. Kazu krime ofensas ba integridade fizika grave-Nú Prosesu: 151/pen/2013/TDS

Kompozisaun Tribunál : Kolektivu
Juis : Dr. Costâncio B. Basmerly Dr. Argentino Luisa Nunes no
Dr. Pedro Raposo de Figueiredo
Ministériu Públiku : Dr. Felismino G. Cardoso
Defeza : Dr. Manuel Gonçalves (Advogadu pribadu)
Konkluziun : Kondena ho pena prizaun tinan 1 suspende ba tinan 3, selu
indemnizasaun \$ 400,00 no absolve arguidu FS ho NS.

Iha 10 Outubru 2013, Tribunál Distritál Suai hala' o julgamentu leitura akordaun ba kazu ofensas integridade fizika grave ne'ebé involve arguidu AC, FS, NS hasoru vítima PDC no GF. Kazu ne'e akontese iha 29 Setembru 2012, iha Distritu Bobonaro.

Ministériu Públiku akuza katak, iha 29 Setembru 2012 maizumenus tuku 12:00 kalan, vítima sira ba tuir seremoña kazamentu iha Sr. Mendes Fernandes nia uma maibe derepenti ema tuda uma lapara.

Tanba ne'e, arguidu AC nervoju sai ho katana no ema halai namakari. Wainhira arguidu sai ba liur, nia haree vítima PDC hamrik hela iha ne'eba no arguidu lori katana taa vítima nia liman sikun depois arguidu mós kontinua duni no taa vítima GF nia ulun.

Aktu ne'e rezulta vítima PDC ho GF hetan kanek no baixa iha óspital referral Maliana durante loron rua.

Ministériu Públiku akuza arguidu kontra artigu 146 Kódigu Penál kona-ba ofensas ba integridade fizika grave ne'ebé ho nia moldura pena hudi tinan 2 to' o tinan 8 prizaun.

Tuir depoimentu husi testemuña MS ho AS katak sira laharee ho matan no lahatene kona-ba akontesimentu ne'e. Maibe iha dader mak sira rona husi ema katak arguidu AC mak ta vítima nain rua.

Iha tribunál arguidu sira konfesa totál faktus sira ne'ebé Ministeriu Públiku akuza ba nia

Iha alegasaun finál, Ministériu Públiku husu ba tribunál atu kondena arguidu tanba arguidu komete duni krime ne'e.

Defeza husu ba tribunál atu fó pena ne'ebé justu ba arguidu tanba arguidu konfesa totalmente ba faktus no provas ne'ebé nia halo, arguidu mós arrepende ba nia hahalok.

Tribunál konklui kazu kazu ne'e hodi kondena arguidu AC ho pena prizaun tinan 1 suspende ba tinan 3 no selu indemnizasaun ba vítima sira \$ 400,00.

Iha parte seluk, tribunál absolve arguidu FS ho NS tanba la hetan faktu ruma kona-ba sira nia involvimentu mesmu momentu ne'ebá sira mos iha tenda laran hotu.

9. Kazu krime pekulatu-Nú Prosesu: 93/pen/2013/TDS

Kompozisaun Tribunál : Kolektivu
Juis : Dr. Pedor Raposo de Feigueiredo no Dr. Argentino Luisa
Nunes no Dra. Florensia Freitas

Ministériu Públiku : Dr. Felismino G. Cardoso.
Defeza : Dr. Marçal Mascarenhas
Konkluzau : Kondena ho pena prizaun tinan 3 suspende ba tinan 4 no
selu kustus judicial \$ 50,00.

Iha 21 Outubru 2013, Tribunál Distritál Suai prezide leitura akordaun ba kazu pekulatu ne'ebé involve arguidu LM nu'udar Xefe Suco hasoru Estadu. Kazu ne'e akontese iha 22 Agustu 2006, iha Distritu Bobonaro.

Ministériu Públiku akuza katak, iha 22 Agustu 2010 arguidu utiliza osan US 5,000.00 ne'ebé partense ba Ministériu Agrikultura no Floresta nian liu husi Fundu Dezenvolvimentu Komunitariu (FDK). Fundu ne'e fornese atu dezenvolve comunidade iha Suco Cota Boot Distritu Bobonaro. Maibe arguidu utiliza osan ne'e hodi halo nia uma.

Mesmu nune'e, arguidu deklarara katak nia prontu atu fó fali osan ne'ebé mak nia utiliza ona ne'e ba Ministériu Agrikultura iha fulan 5 nia laran.

Bazeia ba pedidu no akordu ne'ebé arguidu apresenta, Ministériu Agrikultura aseita ho deklarasaun ne'ebé arguidu hato'o ba tribunál.

Ministériu Públiku akuza arguidu sira kontra artigu 295 Kódigu Penál kona-ba pekulatu ne'ebé nia moldura pena husi tinan 3 to'o 10.

Iha alegasaun finál, Ministériu Públiku husu ba tribunál atu kondena arguidu ho pena prizaun tinan 2 fulan 6 suspende ba tinan 4.

Defeza husu ba tribunál atu fo pena suspensaun ne'ebé kman'an ba arguidu tanba arguidu konfesa loloos tuir faktus no provas ne'ebé mak nia halo.

Bazeia ba faktu sira ne'e, tribunál konklui kazu ne'e no kondena arguidu ho pena prizaun tinan 3 suspende ba tinan 4 no selu kustus judicial \$ 50,00.

10. Kazu krime aktu seksuál ba adolusente -Nú Prosesu: 182/pen/2013/TDS

Kompozisaun Tribunál : Singulár
Juis : Dr. Costâncio Barros Basmery
Ministériu Públiku : Dra. Benvinda da Costa Rosario
Defeza : Dr. João Henrique de Carvalho
Konkluzau : Kondena ho pena prizaun tinan 1 fulan 2 suspende ba tinan 2
no selu kustus judicial \$ 20,00.

Iha 09 Outubru 2013, Tribunál Distritál Suai prezide julgamentu leitura akordaun ba kazu aktu seksuál ho adolusente ne'ebé involve arguidu Armansyah hasoru vítima EMB. Kazu ne'e akontese iha 15 Agutus 2012, iha Distritu Same-Manufahi.

Ministériu Públiku akuza katak, iha 15 gustus 2012, maizumenus iha tuku 11:00 kalan, arguidu lori vítima ba nia kuartu laran hodi halo relasaun seksuál ho vítima dala rua.

Iha tribunál, arguidu deklarara katak sira halo relasaun seksuál ne'e tanba hakarak ho hakarak. Arguidu mós deklarara katak durante ne'e sira namora, maibé to'o ikus arguidu rona fali katak

vítima nia inan ho aman la aseita ho sira nain rua nia relasaun ne'e. Maibe aktulamente arguidu ho vítima moris hamutuk ona hanesan feen ho laen.

Ministériu Públiku akuza arguidu kontra artigu 178 Kódigu Penál kona-ba aktu seksuál adolsente ne'ebé sei hetan pena prizaun to'o tinan 5.

Iha alegasaun finál Ministériu Públiku intrega tomak ba tribunál mak decide no defeza husu ba tribunál atu fó pena suspensaun ba arguidu.

Bazeia ba faktus hirak ne'ebé produz iha julgamentu, tribunál konklui kazu ne'e hodi kondena arguidu ho pena prizaun tinan 1 fulan 2 suspende ba tinan 2 no selu kustas judicial \$ 20,00.

11. Kazu krime danu simples-Nú Prosesu : 179/pen/2013/TDS

Kompozisaun Tribunál : Singular
Juis : Dr. Pedro Raposo de Figueiredo
Ministériu Públiku : Dr. Felismino Garcia Cardoso
Defeza : Dr. Marcal Mascarenhas
Konkluzau : Kondena arguidu ADC ho pena multa \$ 35,00 no absolve arguidu TDC

Iha 04 Outubru 2013, Tribunál Distritál suai hala'o julgamentu ba kazu danu simples. ne'ebé involve arguidu ADC, TDC hasoru JDC. Kazu ne'e akontese iha 12 Febreiru 2013, iha Distritu Covalima.

Ministériu Públiku akuza katak, iha 14 Febreiru 2013, maizumenus iha tuku 09:00 kalan, arguidu sira ba vítima nia uma no arguidu ADC lori fatuk tuku no tebe vítima nia odamatan too rahun.

Arguidu sira deklara katak, motivu husi akontesimentu ne'e tanba,vítima dehan arguidu sira milisia.

Arguidu sira konfesa totalmente faktus ne'ebé Ministériu Públiku duun ba sira no deklara katak sira arepende sira nia hahalok no ba future sei la halo tan hahlok refere hasoru vítima no ba ema seluk.

Ministériu Públiku akuza arguidu kontra artigu 258 Kódigu Penál, kona-bá danu simples. ne'ebé sei hetan pena prizaun to'o tinan 3 ka multa.

Tuir depoimentu husi AS nia haree ho matan katak arguidu ADC mak estraga duni odamatan ne'e.

Iha alegasaun finál Ministériu Públiku husu tribunál atu aplika pena multa tanba faktus no provas provadu katak arguidu involve duni iha krime ne'e.

Defeza husu tribunál atu fo pena ne'ebé justu ba arguidu sira tanba arguidu sira konfesa tuir faktus ne'ebé mak nia halo.

Tribunál konklui kazu ne'e hodi kondena arguidu ADC ho pena multa \$ 35,00 no absolve TDC husi prosesu ne'e.

12. Kazu krime roubu -Nú Prosesu: 107/pen/2013/TDS

Kompozisaun Tribunál : Kolektivu

Juis : Dra. Florencia Freitas Dr. Pedro Raposo de Figueiredo no Dr.
Argentino Luisa Nunes
Ministériu Públiku : Dr. Antonio Tavares
Defeza : Dr. Marcal Mascarenhas
Konkluzau : Kondena ho pena prizaun tinan 3 suspende ba tinan 4.

Iha 10 Outubru 2013, Tribunál Distritál Suai hala'o julgamentu ba kazu roubu ne'ebé involve arguidu FS, PMMS, AC no JS hasoru Estadu. Kazu ne'e akontese iha 11 Outubru 2013, iha Distritu Covalima.

Ministériu Públiku katak, iha 11 Outubru 2013, maizumenus tuku 11::00 kalan, arguidu sira ba asalta guarda olipejadu nian ne'ebé estadu uja atu hodi hadia eletriksidade ba povu iha Zumalai.

Aktu ne'e, rezulta guarda sira tauk no halai hodi husik hela sasan sira iha armazen no arguidu sira ba foti mota bomba 2 no gerador 1.

Iha tribunál, arguidu sira deklar katak los duni sira mak foti no hadau sasan sira ne'e iha kalan akontesimentu ne'e. Maibé iha dader arguidu sira lori ba entrega fali iha polisia no Xefe Suco nia uma.

Ministériu Públiku akuza arguidu kontra artigu 253 Kódigu Penál, kona-ba krime roubu.

Iha alegasaun finál, Ministériu Publikú husu ba tribunál atu kondena arguidu sira pena multa. Alegasaun ne'e bazeia ba produsan provas hatudu katak arguidu komete duni krime ne'ebé Ministériu Publikú akuza ba arguidu.

Defeza husu tribunál atu fó pena ne'ebé justu ba arguidu tanba sira konfesa totalmente ba faktus no provas ne'ebé mak sira halo.

Bazeia ba faktu sira ne'ebé produz durante julgamentu, tribunál konklui prosesu ne'e no kondena arguidu ho pena prizaun tinan 3 suspende ba tinan 4.

13. Kazu krime furtu agravadu –Nú. Prosesu: 176 /pen/2013/TDS

Kompozisaun Tribunál : Kolektivu
Juis : Dr. Pedro Raposo de feigueiredo, Dr. Costâncio B. Basmery,
Dra. Florencia Freitas
Ministériu Públiku : Dr. Felismino G. Cardoso
Defeza : Dr. Marcal Mascarenhas
Konkluzau : Sei kontinua prosesu

Iha 08 Outubru 2013, Tribunál Distritál Suai hala'o julgamentu ba kazu furtu agravadu ne'ebé involve arguidu AN, SA, MCR no NB kontra Igreja Suai no loja Tailandia. Kazu ne'e akontese iha 04 Maiu 2013, iha Distritu Covalima.

Ministériu Públiku akuza katak, iha 04 Maiu 2013 maizumenus tuku 09:00 kalan, arguidu sira ba igreja Ave Maria Suai hodi tama ba na'ok sasan iha igreja laran, no arguidu sira mós kontinua ba na'ok sasan iha loja tailand nian. Total sasan ne'ebé mak arguidu sira foti hamutuk \$ 19,000,00.

Ministériu Públiku akuza arguidu sira kontra artigu 252 Kódigu Penál kona-ba furtu agravadu ne'ebé nia pena prizaun husi tinan 2 to'o tinan 8.

Iha tribunál, arguidu sira deklara katak, los duni sira mak tama no no'ak sasan iha kalan akontesimentu ne'e.

Iha alegasaun final, Ministériu Públiku husu ba tribunál atu kondena arguidu sira tanba arguidu sira komete duni krime ne'e.

Defeza husu ba tribunál atu fo pena ne'ebé justu ba arguidu sira tanba arguidu sira konfesa loloos tuir faktus no provas ne'ebé mak sira halo.

Depois rona tiha alegasaun husi parte sira, tribunál adia fali julgamentu ba iha 30 Outubru 2013 tuku 10:00 dader, ho agenda rona leitura sentensa.

14. Kazu krime violénsia doméstikaNú. Prosesu: 197/pen/ 2013/ TDS

Kompozisaun Tribunál	: Singular
Juis	: Dr. Pedro R. De Feguiredo
Ministériu Públiku	: Dr. Felismino G. Cardoso
Defeza	: Dr. Marcal Mascarenhas
Konkluzau	: Kondena ho pena prizaun fulan 6 suspende ba tinan 1

Iha 21 Outubru 2013, Tribunál Distritál Suai prezide julgamentu leitura sentensa ba kazu violénsia doméstika ne'ebé involve arguidu CC hasoru nia feen. Kazu ne'e akontese iha 05 Jullu 2013, iha Distritu Covalima.

Ministériu Públiku katak, iha 05 Jullu 2013, maizumenus tuku 04:00 madrugada, arguidu basa dala rua iha vítima nia hasan parte karuk no no tuku dala ida iha kabun.

Ministériu Públiku akuza arguidu kontra artigu 145 Kódigu Penál, kona-ba ofensas ba integridde fizika simples ho natureza krime violénsia doméstika konjuga ho artigu 35 alinea (b) Lei Kontra Violénsia Doméstika.

Iha tribunál, arguidu konfesa totalmente ba faktus ne'ebé mak nia halo. Aarguidu mós arrepende nia hahalok no promete katak nia sei la halo tan hahalok ne'e ba vítima iha loron ikus mai.

Iha alegasaun final, Ministériu Publikú husu ba tribunál atu aplika pena multa ba arguidu.

Defeza husu tribunál atu fó pena suspensaun ne'ebé kma'an ba arguidu sira tanba arguidu sira ho vítima diak malu, hanesan bai-bain no nunca mósu problema to'o agora.

Tribunál konklui kazu ne'e hodi kondena arguidu ho pena prizaun fulan 6 suspende ba tinan 1.

Atu hetan informasaun kle'an favor kontaktu direitamente:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
info@jsmp.minihub.org
telefone: 3323883/77295795
webiste: www.jsmp.tl

facebook www.facebook.com/timorleste.jsmp

twitter: @JSMPtl